

續金華叢書



續金華叢書



孫威數
征南錄

表勵準



甲春康宗校
子永胡楸鋟

孫威敏征南錄

續金華叢書

宋 滕 元 發 撰

皇祐四年夏四月廣源州蠻儂智高寇邕州守臣陳鞏死之遂擊破橫貴襲潯藤梧封康瑞九州五月進圍廣州城纔容府寺倉廩而城下之民剽殺略盡朝廷始命起居舍人楊畋閤門副使曹修安撫嶺外團練使張忠蔣偕鈐轄兩部兵馬以南征越秋七月樞密直學士孫公自徐州徙帥秦請覲京師八月庚辰告辭將西矣上曰吾始意召卿將賴以平嶺賊今其微矣時廣東使者鮑軻奏於朝上信其然公對曰是非告陛下以實者臣竊聞賊破邕至廣廣天下寶貨之儲而蕃舶之家常以億萬計賊悉取之曰據劉王山縱酒大會亡命歸之者萬餘人而官軍未嘗勝是豈衰息耶上驚其語注目謂之曰昔黃巢以二千人過嶺莫能制之者公曰明朝雖非唐季之比過慮庸何傷是日公出宿國門外遂行翌日聞張忠蔣偕軍相次敗於白田忠死之偕僅以身免楊畋尋亦乞棄英州壬午有詔止公毋行中日

堂劄留議事越五日戊子復令陞見上諭執政曰南賊果如孫某料
二府由此慊公明日詔除公江南西路荆湖南路安撫使又明日入
對上曰南賊如此欲遣富弼弼母老度必辭汝爲朕行令石全斌副
汝公曰臣祿於從官之列素雖有疾惡敢辭然賊勢盛須有將佐士
馬甲鎧金穀之資苟闕焉亦諸將之今日也今未敢承命俟有奏論
又明日陞對願得宣撫使可以集事以爲其貳執政疾其言公曰苟
不如請願朝廷應副軍須使無後顧之患詰難更數端不得請公曰
無素具則當盛賊勢必敗事徒受責何益宰相陳執中曰敗事豈止
於責耶又曰密學無張皇公對曰是欲示鎮靜耶有備固當爾無備
而示鎮靜此危亡之本也國家生靈可見戲乎又明日乞兵萬人馬
千騎金帛稱之裨校八人掌機要文籍者四人軍前備指顧者二十
人難者曰南方非用馬之地何以馬爲公曰賊去朝廷遠苟當用馬
豈朝奏而暮得耶然終以馬勝又乞兼安撫江南東荆湖北兩路冀
以四路共贍軍蓋向之兩路貧部也復爲大臣所沮越二日詔促行

纔得人馬軍七百人文臣四人備指顧者十人安撫池江饒太平四州及辭對上曰臣之所乞舉不從臣雖欲盡愚報陛下勢不能死固不足惜惜羞國爾至如乞宣撫使事蓋舊例兩府大臣爲之凡有須於郡國無遠近皆給之今臣所能令者兩路及四窮州而已非所部誰應軍需者上曰卿第行事且急爲卿出宣撫使公再拜曰審如德音平南必矣上喜曰卿先到彼但多爲備公復對曰臣不知大臣何以見沮止如楊暉蔣偕輩行無所請亦無功效今臣與石全斌軍行當苟避賊其敢虛死以憂朝廷萬一賊平臣止求致仕至遣宣撫一司須賴聖明獨斷公求致仕之言蓋嘗有譖其張皇賊勢事成而邀賞者故以言將行慮賊入湖南於是先爲虛聲飛報荆湖南北曰大兵卽至促多建營壘及將佐數十字盛儲賞犒之備傳之諸郡於是人心稍定賊以故不敢過嶺既行之後蔣偕又陷賊於賀州九月甲辰公行至鼎州加安撫廣南東西路又以樞密副使狄青爲宣撫使公遂留長沙一月以待且思所以制勝之具朝夕不怠公疾且病矣

大臣疑其不肯行上遣御醫周應與中貴人來過嶺視疾因道上語曰大臣不爲孫某地朕須應副令了南事有裨將晉人李定者父子兄弟凡七人閑戰鬪公遣先之桂象間逆朝廷所遣兵次於賓州慮其爲人所使貪功敗事令之曰妄出戰吾斬汝一家後桂帥果使之定不聽屯賓之如和關外賊至不與戰遂引去及使他兵果敗乃陳崇儀軍也賓象由是而完公之計也十有一月集軍費得錢帛百萬矣又聞賊之長技用蠻牌捻槍每人持牌以蔽身二人持槍夾牌以殺人眾進如堵弓矢莫能加久爲南患公乃多備長刀大斧制其所長南方水潦不時而瘴癘將作燥濕之具百計悉備備成而狄至過嶺而南時十有二月也狄與公議事公以三策料曰賊出上計歸其巢穴中計守邕城自固以久王師下計與吾戰今度其必出下計焉何者彼以天幸橫行大嶺之外有驕我心驕則必出出則必敗使吾二人者心和而謀協狂寇奚容不誅某請遇事密輸計於太尉太尉自行之軍中無二令自取美名非我意也狄大喜出其非望公以身

下之後有處置狄常令軍中曰此事是孫密學擘畫及歸朝亦數以告上二公之心人以爲難明年正月達賓象間大軍及輜重凡四萬人出崑崙關行三日部曲前後不相屬宿朝天驛公乃謂狄曰兵行如此卒遇賊何以支是夕申命諸校各有隊伍明日果遇賊於歸仁鋪賊在山後偏將孫節祝貴陣於前石全斌爲左翼劉几爲右翼狄與公暨桂帥余靖處中軍李定殿其後賊將戰余懼棄所部入公軍公叱去之象眾據山而陣孫節恃勇出與之爭地形公疾呼節曰此豈爭地利處耶節不聽兵小衄死焉狄素奇之失聲驚呼節之餘軍與祝貴軍復振遂用公之刀斧斫牌鎗響震山谷先所命三百騎爲奇兵出山背突賊後潰前軍乘之殺傷數千人賊遂遁保邕城公欲圍城以取之狄不許是夜官軍乃寨於山前公曰軍中必由一二人怯於戰者虛聲相連乃下令軍中敢夜有呼叫者斬漏二鼓他寨果驚呼賊聞以爲大軍至遂空壁而去獨公所部無一人動者明日兵進邕州狄嫌以恩悅軍不卽賞眾皆惴惴或偶語者公乃與狄議曰

士卒冒萬里險瘴以立功奈何不賞耶萬一有變非太尉計狄於是
取下賞賞之眾遂定已而治附賊者公乃曰太尉曰其脅從者可以
盡誅耶當先爲公詰其端送至廷下者乃可殺太尉曰諾由公所全
活者蓋數十百人狄先還京師公留邕計事以舊戍兵三歲一易
瘁死者十常七八乃令本道擇善地番休留邕者止一歲故人樂
戍郡城惟三門公新作北門號曰歸仁門使向闕示其有歸懷之意
及闢土乃得舊址眾服公識又表洪譚籍重兵多蓄財以給嶺外築
城撫集亡民散卒置博易務通諸蠻之有無民之因賊而科徭賣鬻
男女爲人奴婢者約以一年折其券及狄至自南還樞府厚賞金寶
官其數子賜第一區而公止與余靖加秩一等公以嘗乞身歸田野
大臣尤公之慙其前害其寵名上曰孫某求致仕矣執政愕然無以
對公尋累乞杭行至南都上曰豈朕指耶詔擢爲樞密副使懇避再
三不獲已面受命焉及領機務昂然有古名臣之風其事非此所得
書也初儂氏世爲廣源大酋智高父嘗寇交趾獲焉智高釋父怨因

結懽好異時交趾使之守廣源又以桀黠爲姦交趾敗走之後據有田州以其守黃光祚之母爲妻佯交特摩國以母嫁其國主旣又并其土眾始乞本朝補田州刺史不得又乞教練使又乞徒賜袍笏又乞每南郊時貢金千兩願常於邕管互市皆不許至令入寇及其敗竄久之至大理國斬首以獻前二公破走智高時令邕守蕭注捕之後得其母與弟戮於都市予嘗謂近世文臣罕有躬戰伐成功名者獨公善爲兵又能身下狄以攘寇難固已鮮哉因錄以示世云

孫威敏征南錄終

永康胡宗楫据墨海金盞本校鈐

宋蘇文忠公自謫所還貽人書曰目中久不見偉人昨至金山見滕元發乘小舟破巨浪來巍然使人神聳其見重如此元發居郡之東陽亟求其書不可得最後得孫威敏征南錄威敏卽孫沔元發判湖州時沔見而奇之謂子當爲賢將教以守劇治邊之略是編乃沔征南之事實錄之以備史家參考余從墨海金壺本鈔出付梓季樵胡宗楸

鼓

樂

鏞

表勵準



甲子 春永 康胡 宗楸 校鋟

公鄉錄序

宋紹興二十四年婺通守洪遵修東陽志其記當代人物僅僅數人蓋斷自渡江以前理則宜然而其所記有下及紹興者又不盡用此例則所遺固多且仙釋之徒與賢士大夫孰愈若滕章敏宗忠簡輩又皆出乎其前而不見列何也最後事類一卷凡稗官小說怪誣猥褻之事涉于婺者悉不棄博則博矣無乃詳于所不必錄而略于所當錄者乎按吾婺昔隸會稽後爲東陽郡以至于今千幾百年矣晉魏以前如江洽中王徵士非劉孝標之文則莫得而知郡志亦失考而賴是以傳然猶不得其名信乎記載之不可闕也況自宋中葉以來材賢繼出其顯于靖康炎紹之際者皆生于嘉祐以後涵濡之深風氣之開豈苟然哉忠義功名宗公當爲第一下逮乾道淳熙呂太史道德文章鄒魯一方師表百代視前世又遠過焉于是名卿相賢牧伯大魁碩儒名人偉士肩摩踵接蓋不可勝數而其季年北山何公魯齋王公則又紹紫陽之的傳至今私淑者猶不失其正亦盛矣